



Caderno da crítica

Cuestionario Proust: María Solar

[Ramón Nicolás 14 Abril 2014](#)

1.– Principal trazo do seu carácter?

– A ilusión polos proxectos, os traballos, as persoas. Son positiva e intento non deixarme arrastrar polo “lado escuro” do mundo. Gusto da luz.

2.– Que calidade aprecia máis nas persoas?

– A sinceridade. Aprecio que me digan a verdade aínda que doa, é a única maneira de avanzar.

3.– Que agarda das súas amizades?

– Que estean sempre aí e que mo fagan saber.

4.– A súa principal eiva?

– Son moi esixente comigo e cos demais.

5.– A súa ocupación favorita?

– Teño a sorte de ter un traballo que se sabes aproveitar ocasiona moitos momentos fermosos, de aprendizaxe, de coñecer xente, e vivir situacións privilexiadas. Cando é así é unha ocupación marabillosa, como escribir. E xunto a iso encántame ocuparme simplemente de gozar da vida.

6.– O seu ideal de felicidade?

– Vivir intensamente, non deixar pasar as horas sen máis. Son moi consciente de que o tempo que temos é limitado así que tento gozar das cousas desde xogar cos fillos, ata conversar con quen ten algo que contar e por suposto, e moi especialmente, do amor. Son unha buscadora nata de momentos felices compartidos.

7.– Cal sería a súa maior desgraza?

– A dor dos que amo.

8.– Que lle gustaría ser?

– Son feliz co que son e con quen son.

9.– En que país desexaría vivir?

– Neste.

10.– A súa cor favorita?

– O negro que absorbe as lonxitudes de onda de todas as cores. Ou sexa que dalgunha maneira as ten todas.

11. – A flor que máis lle gusta?

– As que atopas camiñando e están aí como un agasallo.

12.– O paxaro que prefire?

– Gústame as curuxas, sempre as tiveron por listas. E son femininas ata os machos. Non hai “curuxos”.

13.– A súa devoción na prosa?

– Non teño mitos, nin son devota de ninguén, creo que cada libro ten o seu momento na vida e incluso unha lectura diferente. Borges vale case sempre.

14.– E na poesía?

– Na poesía pásame exactamente o mesmo, incluso máis, gústame moito a poesía dalgunhas mulleres como Berta Dávila ou Olga Novo, pero podo quedar días refuxiada nun poema dun clásico.

15.- Un libro?

– O dicionario da Real Academia Galega, imprescindible.

16.- Un heroe de ficción?

– “Mazinger Z” teño unha fixación con el porque de pequena cando xogabamos nunca podía ser Mazinger, sempre tiña que ser “Afrodita A” porque era unha nena.

17.- Unha heroína?

– “Tormenta” unha mutante poderosa e intelixente dos X-men. “Afrodita A” está moi limitada nas armas só ten o “pechos fuera”. Pero insisto en que sempre elixiría un superheroe, en xeral vailles mellor.

18.- A súa música favorita?

– Non me chegaba o día para apuntala. A música é imprescindible para min. Encántame descubrir cousas novas. E nos que están sempre pode ir dos Holywater, ou Narf por aquí aos Red Hot Chili Peppers por alá.

19.- Na pintura?

– Calquera que non me sexa indiferente. Non teño pintores favoritos, teño obras favoritas.

20.- Un heroe ou heroína na vida real?

– Miña nai, que viviu nunha época na que se lle negaron moitas cousas e foron auténticos heroes diarios.

21.- O seu nome favorito?

– Aldara, o da miña filla.

22.- Que hábito alleo non soporta?

– Non soporto a quen non fai o seu traballo.

23.- O que máis odia?

– A inxustiza, a calquera escala. Que fagan mal a alguén.

24.- A figura histórica que máis despreza?

– Todas as que teñen as mans manchadas de sangue.

25.- Un feito militar que admire?

– A toma e posterior liberación de Perejil. Estás de coña, non Ramón?

26.- Que don natural lle gustaría ter?

– A ubicuidade, facilitaría moito ser muller.

27.- De que maneira lle gustaría morrer?

– Nos brazos do meu amor e sabendo que marchou. Aí acubillada como se fora durmir.

28.- Cal é o seu estado de ánimo máis habitual?

– Un estado de ánimo animoso. Son alegre por natureza e por autoconvencemento de que é a mellor maneira de vivir a vida.

29.- Que defectos lle inspiran máis indulxencia?

– Os que se derivan da ignorancia non buscada.

30.- Un lema na súa vida?

– Todo é posible... por intentalo non vai quedar.